



Republika e Kosovës
Republika Kosovo / Republic of Kosovo
Kuvendi i Komunës Rahovec
Opština Skupština Rahovac/Municipality of Rahovec



PROCESVERBAL

Nga mbledhja e rregullt e Kuvendit Komunal të Rahovecit, e mbajtur më **30.5.2023 (e martë)**, me fillim në orën **10:35**. Mbledhjen e kryesoi Kryesuesi i Kuvendit, **zt. Defrim Kafexhiu**. Në fillim konstatoi se ka kuorum për mbajtjen e mbledhjes.

Kryesuesi: Fillimisht, përshëndetje për të gjithë! I nderuar Kryetar i Komunës, **zt. Smajl Latifi**, Nënkryetar **zt. Fatmir Iska**, të nderuar anëtarë të Kuvendit Komunal, drejtorë të drejtorive komunale, zyrtarë, përfaqësues të KFOR-it, medie, të nderuar qytetarë të Komunës së Rahovecit, kjo është seanca e pestë (5) për këtë vit kalendarik. Komiteti për Politikë dhe Financa, në mbledhjen e mbajtur më 19 maj, për këtë seancë, ka përgatitur këtë:

REND DITE

RAHOVEC / ORAHOVAC

Njësia Nr./Br./No 01(Kuvendi i Komunës)

Nr./Br./No 86 Nr. i faq./Br.str./No.pg 01/23

Datum/Data 27.06.2023

1. Shqyrtimi dhe miratimi i procesverbalit nga mbledhja e kaluar;
2. Pyetjet dhe përgjigjet në pyetjet e kuvendarëve;
3. Informatë mbi Qarkoren e parë buxhetore 2024/1;
4. Shqyrtimi dhe miratimi i propozim-vendimit për dhënien në shfrytëzim afatshkurtër të pronës së paluajtshme të komunës P- 71510069-01910-6, në zonën kadastrale – Retijë;
5. Shqyrtimi dhe miratimi i propozim-vendimit për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës P- 71510069-01910-6, në zonën kadastrale – Retijë;
6. Shqyrtimi dhe miratimi i propozim-vendimit për dhënien në shfrytëzim afatshkurtër të pronës së paluajtshme të komunës P- 71510002-01002-0, në zonën kadastrale – Bellacërkë;
7. Shqyrtimi dhe miratimi i propozim-vendimit për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës P- 71510002-01002-0, në zonën kadastrale – Bellacërkë;
8. Shqyrtimi dhe miratimi i propozim-vendimit për shpallje me interes të përgjithshëm publik P- 7151057-02240-1, në zonën kadastrale – Rahovec;
9. Shqyrtimi dhe miratimi i propozim-vendimit për dhënien e pëlqimit për shpronësimin e pronës së paluajtshme P-71510052-00363-0, zona kadastrale - Mrasor;

Shtesë: Shfuqizimi i vendimit Nr.62/2023 për bartjen e mjeteve vetanake të pashpenzuara nga viti 2022 në 2023;

Kryesuesi - Arsyeja e shfuqizimi të pikës shtesë është sepse Ministria e Financave ka marrë një vendim tjetër për zhbllokimin e mjeteve të komunave dhe rrjedhimisht ky vendim duhet të shfuqizohet nga kuvendi i komunës, që në seancën tjetër ta votojmë një vendim tjetër.

A ka dikush ndonjë koment rreth rendit të ditës për seancën e sotme?... Apo ndonjë koment për pikën shtesë?... Nëse jo, atëherë kush është “për” vendosjen e kësaj pike shtesë në rend të ditës?... Me shumicë votash, rendit të ditës i shtohet edhe pika e dhjetë. Po e vendosim në votim për miratim edhe rendin e ditës, kush është “për”?... Me shumicë votash miratohet rendi i ditës për seancën e sotme.

1. Shqyrtimi dhe miratimi i procesverbalit nga mbledhja e kaluar;

Kryesuesi – A ka dikush prej anëtarëve të kuvendit diçka për të thënë rreth procesverbalit nga mbledhja e kaluar?... Nëse jo, atëherë po e vendosim në votim, kush është “për”?... Me shumicë votash, miratohet procesverbali i seancës së kaluar.

2. Pyetjet dhe përgjigjet në pyetjet e kuvendarëve;

Vlora Vuçiterna Çmega – Përshëndetje për të gjithë! Nënkrytar, po ju drejtohem juve meqenëse kryetari momentalisht nuk është këtu i pranishëm. Çka po ndodh në konkurset që po i shpallni nëpër sektorë të ndryshëm?... Në konkurset e drejtimeve farmaci, infermieri apo edhe stomatologji, kandidatët me numër maksimal të pikëve janë familjarë të ndonjërit nga ju. Para një viti e kam parashtruar pyetjen se a do të ketë shpresë edhe për kandidatët e tjerë që të pranohen në këtë pozita! Përgjigjen e kam ditur, por pyetjen e kam bërë qëllimisht që të vetëdijesohet edhe një pjesë tjetër e banorëve të cilët kanë pasur sado pak dyshim në këtë aspekt dhe me ndodhitë e konkurseve të fundit, janë bindur plotësisht. Me bindje të plotë po e them se kjo që ka ndodhur është një ndër skandalet më të mëdha të juaja.

Lirigzon Kastrati – Faleminderit kryesues! I nderuar ekzekutiv, të nderuar kolegë anëtarë të kuvendit të komunës. Reagimi im ka të bëjë rreth një tenderi dhe që është anuluar kontrata e akvititetit të prokurimit. Operatori ekonomik i cili e ka fituar këtë tender, dyshohet që i ka përcaktuar çmimet vet, gjë që është shkelje ligjore. Neni 65 i ligjit të prokurimit thotë: Operatori ekonomik nuk ka të drejtë që të marrë pjesë në aktivitet të prokurimit ose në ekzekutimin e ndonjë kontrate publike që shfrytëzohen nga autoritetet përkatëse kontraktuese. Sipas këtij neni, prokurimi ka bërë shkelje ligjore dhe ky keqadministrim i buxhetit është në dëm të qytetarëve të komunës së Rahovecit. Doja të ndërlihem edhe me aktivitetin që është duke e ndërmarrë Komuna e Rahovecit në rregullimin e rrugëve fushore, sipas njoftimit në faqen e Komunës, ka filluar mirëmbajtja dhe rregullimi i rrugëve fushore dhe a do të vazhdojë edhe në rajonet e atyre që kanë bërë kërkesa.

Edonë Kryeziu - Përshëndetje për të gjithë të pranishmit! Faleminderit i nderuar kryesues. Gjatë kontakteve të vazhdueshme që kam me qytetarët e fshatit Xërxë, në pyetjen time dua t’i dëgjoj disa opinione nga ana e kryetarit dhe e drejtorisë së Shëndetësisë. QMF-ja mungon vetëm në fshatin Xërxë, përkundër bashkësive lokale tjera. Kërkojmë që AMF-ja e fshatit tonë të shndërrohet në QMF. Udhëzimet administrative të këtyre sektorëve i kemi lexuar me shumë vëmendje dhe një veprim i tillë i takon fshatit Xërxë, duke e ditur pozitën gjeografike, numrin e banorëve, fluksin e banorëve, ka pak emigrim dhe poashtu ka biznese e shumta. Kryetar, a e dini sa maltretim është që një pacient i sëmurë ta kryej shërbimin në Xërxë, ndërsa vulën në Rahovec! Kur i pyesim punëtorët, pse ky maltretim, ata përgjigje: Sepse e kemi statusin AMF. Poashtu, mantilbardhët detyrohen edhe ta pastrojnë ambientin e AMF-së, sepse pastrueset punojnë një herë në javë! A është e mjaftueshme mirëmbajtja vetëm një orë gjatë javës?... Në fund, qfarë po ndodh me rrogat jubilarë të punëtorëve të këtij sektori dhe pse duhet që çdo herë ta marrin atë përmes proceseve gjyqësore, duke u bërë rutinë që proceset gjyqësore t’i fitojë pala dhe asnjëherë komuna.

Sejfullah Sejfullahu – Faleminderit kryesues! Përshëndetje kryetar, drejtorë, kolegë asambleistë, media. E kam një shqetësim që ka ndodhur mbrëmë në Krushë të Madhe, është djegur pushimorja apo objekti i Feim Durakut. Ftojme prokurorinë për hetim, ta ndriçojnë këtë rast sepse kjo i zbeh edhe investitorët potencial në atë anë. Tjetra, janë dy rrugë fushore në gjendje shumë të keqe, mirë është të zgjidhet. Kemi nevojë edhe për një fushë të sportit sepse kemi presion nga komuniteti.

Ilir Pallqa – Faleminderit! I nderuar kryesues, kryetar, kolegë asambleistë, drejtorë, të pranishëm. Të dashur banorë të Komunës së Rahovecit! Jemi në Pranverë, moti po ndryshon për të mirë – vetëm moti. Në Rahovec po punohet kryesisht në bujqësi – punë që na nderon. Rinia po ik kryesisht në perëndim – kjo na bënë fajtorë. Largimi është dorëzim, nuk është mirë të ikim, por fatkeqësisht nuk ka argumente të mjaftueshme sa të arsyetohet qëndrimi me çdo

kusht, sepse pas çdo arsytimi tim ka dhjetra arsye nga ana tjetër për mosqëndrim! Prapë mendoj që duhet të qëndrojmë, të rezistojmë, të flasim, e të veprojmë kundërdrejt çdo të keqe që i bëhet shoqërisë sonë. Në fund të fundit, ndryshimi arrihet duke u nisë nga individit e më pas nga shoqëria. Arsyet janë të ndryshme, ata që kanë vendosur, kanë vendosur. Ata që janë në dyshim, duhet të qëndrojnë, por nëse ne vazhdojmë kështu (ose më saktë, nëse ju vazhdoni kështu) nuk do të qëndrojnë as këta. Komuna jonë ndoshta është e vetmja komunë që nuk ka qytet, për nga forma veçohet që është fshati më i madh në Kosovë. Prej Majës së Shkodranit, kur i kthejmë sytë në ndërtim, e shohim ngjyrën e kuqe (tjegullat e kuqe, përgjithësisht kuq). Kur kthehemi në rrafsh, shohim çrregullime, vjetërsira të shëmtuara dhe rrugë të shkatërruara. E gjithë kjo, si pasojë e udhëheqësve në komunë. Te ne, aktualisht po udhëheq një njeri me emocione të hargjuara për Rahovec. Kryetari ynë po udhëheq pa plan dhe pa vizion, po udhëheq sipas planeve të shokëve të tij, të shokëve biznesmen, të cilët prioritet e kanë pasurimin personal dhe të fundit e kanë interesin publik. Po udhëheq duhe rahatuar njerëz partiak e familjarë nëpër institucione publike. Po udhëheq me fjalime të mjedhshme e me punë të kufizuar rreth interesave të ngushta të AAK-së. Ne po heshtim! Rinia kërkon një mjedis pune ku ka meritokraci, e ku ka sfida për ta arritur qëllimin. Po heshtim kur shohim vit pas viti ndarje të mjeteve bujqësore, kjo është mirë, por të bëhet me masë dhe me hak. Rinia kërkon projekte interesante dhe inovative për angazhim personal. Po heshtim kur shohim ndërtime pa leje, rinia kërkon rekreacion! Nuk duhet të heshtim, duhet të qëndrojmë, të flasim dhe të veprojmë.

Bejtullah Deliu – Faleminderit kryesues! I nderuar kryetar, zv.kryetar, drejtorë, kolegë, media. Një pyetje rreth rrugës “Sheh Myhedini”! Në këtë kohë nuk ka fare punime edhe pse jemi në një fazë kur mirëpriten mërgimtarët! Mirëpo, nëse kjo rrugë nuk rregullohet pritët të kemi një ngulfatje të komunikacionit. A kemi shpresë që sa më shpejt të rregullohet?

Eqrem Spahiu – Faleminderit kryesues! Përshëndetje për të gjithë. I kam dy pyetje: Punimet në zonën ekonomike kanë filluar gati qe një muaj, në hyrje të fshatit të ketë një hyrje të veçantë për shkaqe sigurie. E dyta: Ne si komision i stacionit të autobusëve jemi pa mjete qe një vit, kur do të bëhet kompenzimi?...

Merisa Sharku – Përshëndetje për të gjithë! Pyetjet e mia vinë rrjedhimisht pas këtij kaosi të madh në qytetin e Rahovecit, kap një, le tjetrën. Kur përfundon sheshi në qendër të qytetit?... Kur përfundon rruga në qendër, ku është bërë devijimi i lumit? Kur përfundon sheshi i republikës dhe rruga “Ali Sokoli” e cila po gropohet dy herë brenda muajit!

Burim Krasniqi – Faleminderit kryesues! Përshëndetje për ekzekutivin, përfaqësues të KFOR-it, media, kolegë asambleistë. Befasohem pse bëhet gjithë këto pyetje rreth projekteve, kur kemi një ekzekutiv totalisht të paaftë për menaxhim të projekteve. Ky ekzekutiv nuk dinë të bëjë projekte zhvillimore, koha është duke e dëshmuar me të gjitha projektet në gjysëm, me ngulfatje totale dhe pa vizion. Rreth tenderit për furnizim për QKMF-në: Kompania e cila e ka bërë paramasën, e ka fituar tenderin. Tenderi është anuluar duke ndërhyrë OSHP-ja. A nënkupton kjo që më herët kanë ndodhur shumë projekte ksisoji? Te ky projekt, a është marrë ndonjë veprim ndaj personit përgjegjës i cili ka lejuar që kompania e njejtë ta fitojë tenderit dhe ta bëjë paramasën. Ju si kryetar komune, a keni marrë veprim rreth personit përgjegjës? Apo solidarizoheni me të sepse e ka bërë për ju. Momenti që nuk ka veprim, nënkupton që je vet i involvuar, në të kundërtën, veprohet ndaj personave që bëjnë shkelje logjore, sepse kjo është publikisht kurdisje e tenderit. Prej drejtorit të financave morëm një informatë rreth borxheve dhe obligimeve: Te pjesa përmbartimore e kemi një vlerë prej 75.000€ që komuna e Rahovecit i ka humbur për vitin 2022 dhe fillimin e 2023-tës. Në procedurë të avokatit dhe për përmbartuesin janë rreth 400.000€ që janë marrë brenda dy viteve (raport zyrtar prej drejtorisë së Financave). I kemi rreth 2.5milion që presin t’i marrin arsimtarët, gjithashtu edhe kjo është çështje e humbur, duke marrë parasysh që shkollat vazhdimisht po i marrin. Te obligimet: Ndërtimi i shkollës fillore të mesme të ulët, “Liria” në Fortesë, nuk janë edhe 7 muaj sepse kontrata është lidhur në 2019, ka përfunduar dhe borxhi është edhe 45.000€. I kemi edhe 14 projekte tjera me afat kohor të përfundur dhe kanë borxhe të mbetura. Sipas raportit të drejtorisë së Financave 15.453.683.06€ janë obligime dhe borxhe. Është edhe servisimi edhe mirëmbajtja e kabinetit të radiologjisë diku rreth 96.000€ kontratë (borxhi 88.660€) e lidhur në 2023, kur ia shtojmë edhe 2-3 milion te disa projekte tjera i bie që Komuna e Rahovecit sot është në obligime 20 milion dhe jo 15 milion, sepse kontratat e vitit 2023 nuk janë të përfshiera në raport. Nëse e keni problem zgjidhjen në punët përmbartimore, pyeteni Sinanin, ju këshillon në këtë punë. Kryetar, cilat janë masat tua të ndërmarra rreth personave përgjegjës që kanë lejuar që e njëjta kompani ta bëjë paramasën dhe e njëjta ta fitojë tenderin?!

Drilon Mustafa – Faleminderit kryesues! I nderuar kryetar, kabinet i qeverisë Latifi, të nderuar kolegë. Kam një pyetje për drejtorinë e Arsimit: Sa shkolla do të pajisen me mjete laboratorike në kontratën që është lidhur ditëve të fundit?... Një shtetësim tjetër që qytetarëve në lidhje me ujitjen e asfaltit që bëhet. A mund të nxerret ndonjë udhëzim administrativ apo a ekziston ndonjë udhëzim administrativ që e ndalon këtë çështje! Shqetësimi tjetër ka të bëjë me koston e lartë të mirëmbajtjes së kanalizimit. Kërkojë që vlera për mirëmbajtje të zbritet. Opozitës i sugjeroj të punojnë më pozitivisht sepse mendimi negativ e sjell vesin, vesi e krijon karakterin dhe karakteri e përcakton të ardhmen! Qytetarët e dinë që me këto mendime, nuk kanë të ardhme me ju!

Hasan Përboqi – Faleminderit kryesues! Përshëndetje kryetar, kryesues, nënkryetar, kolegë, drejtorë. E kam një sugjerim për opozitën, të koordinohen më shumë në mes vete. Te pyetjet e bëra në diskutime thanë që “asgjë s’po punoni”, gjatë diskutimeve u përmendën 7-8 projekte në qytet që janë në punime e sipër! Kordinohumi më mirë, se jeni duke dalur keq para qytetarëve.

Sinan Kryeziu – Faleminderit kryesues! Përshëndetje për të gjithë të pranishmit në sallë. U fol për punësime në QKMF: E para e punës duhet të nisemi prej kronologjisë sesi janë bërë punësimet në komunën tonë! Nuk është Smajl Latifi kryetar që 23 vite, është mandati i tretë (7 vite qeverisje) dhe si pyetje e kam, si janë punësuar tjerët e partive tjera prej pas luftës e deri sot?! Mendoj që është paragjykim kur thuhet që ka direkt ndikim në punësime. Meqenëse jam jurist dhe nëse pretendoni që ka pasur shkelje në konkurse, ju kallxoj formën: Fillimisht duhet ta bëni një ankesë në inspektoriatin e punës, pastaj një kallëzim penal në stacion të policisë dhe kur të vërtetohet kanë të drejtë ta bëjnë një padi në kontest civil. Më ka bërë përshtypje kryetari i ish partisë time, Albin Kurti, në një emision thotë që ai ka vota më shumë sesa tri partitë opozitare bashkë. Duke e bërë një analogji që në komunën tonë Smajl Latifi në raundin e parë i ka marrë individualisht 10.144 vota (47.18%), VV 5341, LDK 3424. Në ruandin e dytë: Smajl Latifi i ka 11.575vota (65.19%). Sa i përket punime në komunë, ka faktor të ndryshëm, faktori kryesor është moti, është mirë që kanë filluar dhe do të përfundojnë të gjitha. Nëse Burimi pretendon që në QKMF është tenderi i kurdisur, e këshilloj ta bëjë një kallëzim penal.

Fahrije Lushi – Përshëndetje për të gjithë! I nderuar kryesues, kryetar dhe të gjithë të pranishmit. E kam një shqetësim të banorëve të fshatit Ratkoc, kemi një “shëtitje” të madhe të qeneve endacak në qendër të fshatit. Kjo dukuri kërkon konsideratë.

Burim Krasniqi – Nuk ka qenë partia kaq e madhe, por e kanë bërë këta! Koha.net dhe Insajderi thonë që tenderi me pajisje mjekësore në QKMF, e ka bërë vetë paramasën dhe e ka fituar tenderin, por OSHP-ja e ka anuluar. Nuk gjykova, vetëm pyeta se cilat masa janë marrë!

Arber Zenuni – Përshëndetje kryesues, kryetar, kolegë. Nuk besoj që ka pasur ndonjëherë opozitë më zhurmuese, arsyeja dihet, po bëhet punë. Sa i përket projekteve, në mandatin e kaluar është bërë një projekt i madh në qendër të qytetit, që ka sjellur rekreacion të madh, pra është ndërtimi i palestrës. Në këtë mandat, ju bëj kërkesë që t’i drejtoheni shëfit të juaj, Kryeministrit Albin Kurtit, ta vizitojë Rahovecin dhe t’i tregoni që Smajl Latifi ka nisur disa projekte dhe i duhet ndihma financiare.

Sejfullah Sejfullahu – Drilon, ne jemi opozitë që bëjmë pak zhurmë sepse kemi presion prej njerëzve, atyre që na kanë votuar dhe banorëve. Mendoj që nuk është korrekte të heshtim! Duhet të bisedojmë për çështjet që mund të arrihen dhe çdo herë për gjëra të mira “i rrehim shuplakat”. Por, nuk e dimë se çka t’iu themi banorëve, Krusha e Madhe 7000 banorë nuk ka fushë sportive.

Rasim Fazliu – Faleminderit kryesues! Përshëndetje për juve, kryetarin e komunës, nënkryetarin, anëtarët e kuvendit, përfaqësuesit e OSBE-së, LMT-së, media. I kam dy çështje: Njëra është për drejtorinë e Shërbimeve Publike rreth rrugëve fushore, në Celinë a është në plan të bëhet ndonjë metër rrugë fushore? Nëse po, është një rrugë shumë e rëndësishme që e lidh Celinën me Fortesë (nëpër vreshta) dhe do të ishte mirë (nëse ka mundësi buxhetore) të shtrohet të paktën me shavorr, duke iu mundësura bujqëve t’i kryejnë punët e tyre. E dyta ka të bëjë me punën e kuvendit të komunës. Në fillim të kësaj legjislature, i kemi zgjedhë komitetet obligative dhe disa komisione! Sa e shoh unë, komisionit nuk janë duke raportuar në kuvend, përkundër asaj që për këtë punë i kemi zgjedhur. P.sh. Komisioni për zgjedhjen e kryetarëve të fshatrave dhe të lagjeve në qytet: Është keq që nuk e kemi raportin këtu, të jemi në dijeni si janë kryer zgjedhjet, a janë kryer në të gjitha fshatrat, a ka pasë pjesëmarrës dhe a kanë qenë zgjedhje të bazuara në rregulloren e kuvendit! Në fund, anëtarët e kuvendit duhet t’i mbrojnë interesat e qytetarëve pavarësisht a janë pozitë apo opozitë dhe nuk është mirë të bëjmë polemika mes vete. Në këtë drejtim është mirë të reflektojë edhe kryesuesi

sepse ekzekutivi është ai që është përgjegjës për të gjitha zhvillimet dhe punimet që kryhen në territorin e Komunës së Rahovecit.

Merisa Sharku – Është mirë që kryetari t'i thotë grupit të vet që nuk kanë nevojë ata të japin përgjigje përderisa kryetari është i pranishëm në seance. Përderisa ata e shfrytëzojnë këtë të drejtë, p'e shfrytëzoj edhe unë. Replikë - Hasanit: Puna e papërfunduar është e barabartë me zero. Projektet po fillohen se ndoshta është mënyra më e lehtë për keqpërdorim (pa paragjykim, është mendim personal). Replikë - Sinanit, “mos e vet se t'kallxon vet”!

Lirigzon Kastrati – Dua të replikoj sepse kolegu Sinan e artikuloj tenderit në QKMF. Njoftimi për anulim të tenderit të datës 11.05.2023, e ka nxjerrë organi i prokurimit. Ai e ka dhënë një bazë juridike për anulimin e këtij tenderi. Ku dyshohet që operatori ekonomik ka ndikuar në përpilimin e listës së çmimeve. Neni 65 të Ligjit të Prokurimit, vetëm që e forcon atë që e tha Burimi.

Kryetari – I nderuar kryesues, anëtarë të kuvendit, përfaqësues të LMT-së, drejtorë, media. Ju dëgjova me vëmendje dhe pajtohem që në fokus duhet të jetë interesi publik. U diskutua edhe numri i votave, por mos e harroni faktin që unë e respektoj edhe atë që nuk ka asnjë votë. Rrjedhimisht kushdo që ka qejf të ndërtojë karrier politike, le të vazhdon të bëjë fushatë, por mos harroni që edhe 2 vjet e gjysmë nuk ka zgjedhje. U diskutur çështja e një tenderi, faleminderit Lirigzon, kësaj radhe ti ke qenë më i saktë sesa shefi yt. Ky tha: E ka anuluar OSHP-ja, ti the autoriteti kontraktues (zyra jonë e prokurimit), pra, e vërteta është ashtu siç the ti. Është një OJQ që e ka konsideru si të një të gjetur, e ka lajmruar Komunën e Rahovecit dhe zyra e prokurimit ka vepruar mirë që e ka ndërprerë procedurën (tender i anuluar). Çështja shtrohet, pse nuk kemi vepruar më herët! Po, unë nuk e kam përvojën e dikujt që ka punuar në Ministrinë e Infrastrukturës për detaje të tenderave, unë nuk jam shef i tenderave. Nuk e lejoj askënd të më cilësojë si “tregtar”! Ndoshta dikush ka përvojë nëpër këto gjëra dhe nuk është mirë të na shesë “pollavra” askush hiç. Në çoftëse bëhen gabime ose defekte në paramasa, dhe në hartimin e projekteve, ju lutem të drejtoheni te ata që janë kompetent përmes ndonjë ankese apo ndonjë kallëzimi penal. Nëse zyra e prokurimit nuk do ta anulonte, natyrisht që unë kam të drejtë të marr masa të caktuara ndaj shefit të prokurimit. Kjo temë është mbyllur me asnjë pasojë financiare. Sa i përket punësimeve: Të gjitha janë me procedurë të rregullt, duke u zhvilluar procedurat në përputhje me ligjin. Njerëzit dëshirojnë të punojnë dhe është shumë mirë që po punësohen. Problemin e kam me konkurrencën, numrin e kufizuar të atyre që kërkohen – Ky është problem që e ka prodhuar paslufta jonë. Punësohen njerëzit dhe do të punësohen çdo here, duke u munduar sado pak ta ndalojmë ikjen e dhimbshme që po ndodh. Sa i përket punishteve, kemi disa punishte të hapura. E di që nuk mund të “ndreqet” diçka pa u “prishë”! Dikush e përmendi këtu që “puna e papërfunduar është e barabartë me zero”. Me teknologjinë dhe revolucionin që po ndodh nëpër botë, ndoshta ka mundsi të kryhen punët pa u nisë hiç!!! Por, unë nuk kam unë informacione të tilla, që pa ia nisur punës, të kryhet puna! Ne i kemi nisur disa punë sepse besoj në realizim, vetëdije, koncept dhe vizion. Rruga “Ali sokoli” do të asfaltohet së shpejti, fillimisht janë duke u bërë disa veprime që lidhen me puseta dhe kablllo. Rrugën në qendër kemi menduar ta përfundojmë në fund të muajit maj, por nuk besoj që vonohet edhe shumë ajo pjesë, do të rregullohet para kohës së ardhjes së mërgimtarëve. Gjithashtu për sheshin në qendër, vazhdon puna në të. Në Sheshin Republika do ta bëjmë edhe një rrugë me gurë, përmes këtij projekti të kontribohet në ruajtjen e trashëgimisë. Koha për sheshin qëndror është tani, përkundër disa vështirësive që lidhen me pëlqime energjetike të KEDS-it, me KRU-Gjakovën dhe të cilat i kanë procedurat e veta. Sheshi qëndror do të bëhet me bindje të plotë, duke u bërë opozitë për operatorin për përsheptimin e punës, në 2025 llogaritet të përfundojë. Punësimeve mund t'i japim dimensione të ndryshme. Jemi një familje e madhe me rreth 60.000 banorë, gati shumica njihemi me njëri tjetrin apo kemi lidhje të ndryshme familjare. Për dallim nga kryetarët tjerë, unë asnjëherë nuk i kam prekur të punësuarit që i kam gjetur në punë, pasi që e kam fituar mandatin. U tha këtu që po punoni vetëm punë të vogla! Pasnesër me 1 qershor, po i përurojmë dy qerdhe dhe mos i minimizoni punët e mira sepse janë vepra të mëdha që iu dedikohen fëmijëve. Sa i përket fushës sportive në Krushë të Madhe, do ta bëjmë një të tillë sepse e meriton, gjithashtu edhe një sallë të edukatës fizike. Sa i përket përmbaruesit, duke i parë edhe raportet e komunave tjera, komuna jonë nuk është keq në këtë aspekt. Nuk mund t'i shmangemi përmbaruesit sepse brenda 30 dite lënda dërgohet në gjykatë, përfundojnë procedurat dhe vjen te përmbaruesi, ato janë pasqyra dhe ne e kemi për obligim t'i jemi transparentë. Rasimi i përmendi rrugët fushore: Kemi filluar me rrugë fushore në Rahovec sepse është pjesë më e terun. Do të vazhdojmë të operojmë tutje pozitivisht edhe në Celinë dhe në shumë pjesë tjera. Për qentë endacak kemi një kontratë dhe kanë filluar të trajtohen, do të ketë më pak qenë endacak ditëve në vijim nëpër vendbanime sepse jemi duke i trajtuar. Qytetin synojmë ta bëjmë me standarde të larta, të mos kemi më kablllo elektrike mbi tokë, t'i fusim nëntokë dhe t'i rregullojmë pusetat që janë aty. Jam prej atyre që mendoj

pozitivisht dhe punët që nisen do t'i përfundojmë. Projekti i Zonës Ekonomike është certifikuar nga ministria, do ta shohim mundësinë nëse është e nevojshme të bëjmë ndonjë hyrje tjetër gjatë punimeve. AMF-ja në Xërxë shpresoj dhe besoj që do të bëhet QMF edhe pse duhet të kemi më shumë buxhet sepse kostoja dyfishohet. Për mirëmbajtjen e AMF-ve, punëtorët e pastrimit shkojnë një herë në javë për pastrim sepse AMF-të kanë shumë pak pacientë. Personeli aty mund t'i pastrojë vet zyret ku rrinë! Le të punojnë më shumë sepse buxheti i komunës ka kapacitet të vogël në këtë drejtim.

Burim Krasniqi – Në ministrinë e Infrastrukturës nuk e di që ka punuar ndonjë asambleistë tjetër këtu përpos meje dhe vazhdimisht nuk ka dashur të hyjë në këto lojëra. Karrierën time profesionale e kam filluar në vitin 2003 në komunë të Rahovecit si inspektor, kam vazhduar në ministri si 23 vjeçar. Për dallim prej deklarimeve tua kryetar, kur keni thënë vazhdimisht për diçka që nuk e keni ditur, “kur kam ardhë si kryetar komune e kam mësuar”! Unë jam ekspert i licencuar i komunikacionit dhe makinerisë prej 2003. Kam punuar në mbi 4000 ekspertiza deri sot, në qoftëse e merr një pagesë mesatare prej 80€, dalin mbi 300.000€ dhe ka qindra realizime tjera me qindra mijëra euro. Është fakt që unë nuk jetoj me qera, por është një fakt i dytë që përkundër krejt kësaj pune, nuk kam para të kursyera në llogari dhe i kam 100.000€ kredi si biznes dhe si familje. Siç e thoni ju, “unë jam Smajl Latifi” edhe unë jam Burim Krasniqi dhe nuk frikësohna para kërkujt, asnjë milimetër të karrierës dhe angazhimit tim profesional dhe politik. Mirë e dhe përgjigjen në fund për anulimin e tenderit, por jo edhe në fillim kur tentove nëse rasisht “po tutet” dhe po ma ndal gojën. Kryetar, këtë praktikë të lutem harroje dhe bëhu konstruktiv. Kurrë në karrierën time nuk kam punuar në zyrë të prokurimit, asnjëherë në vlerësim të ofertave dhe asnjëherë në pranime teknike.

Kryetari – Askush nuk e akuzojë askënd dhe askush nuk e detyron askënd ta deklarojë qfarë pasurie, ka sepse është agjencioni anti – korrupsion për këtë gjë. Dikush e përmendi që 4000 kontrata i ka nënshkruar, mund të jenë edhe 100 dhe në ato të ketë gabime! Me 4000 kontrata duhet të jetë administrata e Tokios dhe mund të ketë gabime. Me 4000 ekspertiza të nënshkruara, del të jetë një super ekspert që nevojë të konkurron në zyrë të prokurimit për të bërë super ekspertiza. Ai që ia nisë i pari do të jem këtu, nëse ia nisë Burimi, jam 24 orë këtu. Nuk foli para kohë asnjëherë, por nëse dikush dëshiron ta sfidoj jam këtu dhe nuk lejoj askënd të luaj me dinjitetin dhe nderin tim. Nëse nuk ka punuar ky në zyrë të prokurimit asnjëherë, ka punuar te patent shoferat! Ruaje pak veten dhe mos u shtyj me kryetari sepse të shtyresh me mua është njëjtë si të provojmë që me gishtin e vogël të këmbës së majtë, ta prekim veshin e djathtë. E treta herë që në këtë foltore prodhohet ironi, fyerje dhe cinizëm në adresë të kryetarit, nga ti. Prit edhe 2 vjet e gjysmë, le të përfundojë mandati, fitoi zgjedhjet dhe tani bën punë të mëdha me super ekspertiza si super ekspert me mbi 4000 ekspertiza.

Ilir Pallqa – Faleminderit i dashur kryesues! Siç ju thash, kryetari po udhëheq me fjalime të rrjedhshme dhe manipulime, pa punë. Tani që po mendoj edhe po punon, sepse disa prej punëve që priten të kryhen këto ditë janë: Punësimi i vajzës së vllaut të kryetarit, punësimi i vajzës së motrës së nënkryetarit, nusja e gruas së nënkryetarit, gruaja e drejtorit të ekonomisë, gruaja e shefit të asambleistëve të AAK-së, kandidatja për asamble nga AAK, gruaja e asambleistit të AAK-së, aktivisti i AAK-së dhe vajza e shokut të kryetarit.

Feriz Thaqi – Ilirit duhet t'i tregoj që 78% i ka kryetari dhe mund t'i dalin të njoftshëm ata që punësohen!

Hasan Përboqi – Faleminderit kryesues! Ky nxitet dhe dhezet vetvetiu. U përmend bashkëshortja e shefit të asambleistëve të AAK-së. Kryetari tha çka keni kundër konkurseve, e keni gjykatën afër. Disa po frigohen të shkojnë atje sepse i ka ra shpesh dhe nuk iu ka dalë mire. Bashkëshortja ime që 4 vite që është e diplomuar dhe i ka dy licenca. Derisa unë kam qenë drejtor në 4 vite në asnjë konkurs nuk ka aplikuar. Në qoftëse ajo e ka fatin e keq që e ka burrin politikan, kjo nuk do të thotë që mos të aplikojë në asnjë konkurs. Pse nuk e përmende që ka dështuar në konkursin për infermieri. Sa i përket punësimeve familjare, ju jeni të fundit që e keni shkelë këtë parim, e më pas dilni nëpër televizione duke thënë që i kemi 51% nuk mund t'i shmangemi. Atëherë ne që jemi me mbi 65% i bie që çdo 1.5 qytetarë të punësohet.

Kryesuesi – Atëherë shkojmë me pauzë rreth një orë...

Atëherë përshëndetje edhe një herë për të gjithë! I nderuar kryetar, nënkryetar, drejtorë, zyrtarë, anëtarë të kuvendit komunal. Para se të rifillojmë dua të jap një vërejtje për ata që kanë diskutuar pas diskutimeve të seancës dhe ju lutem që gjatë diskutimeve brenda sallës së kuvendit të jemi më të qetë, sepse jemi të zgjedhur me votë dhe duhet të kemi etikë të punës. Nëse e kemi mirëkuptimin mund ta përmbyllim pikën e dytë të diskutimeve.

3. Informatë mbi Qarkoren e Parë buxhetore 2024/1;

Afrim Limani – Faleminderit kryesues! Përshëndetje për ju, kryetarin, nënkryetarin, asambleistët. Me datë 15.05.2023 në adresë të Komunës së Rahovecit ka ardhur qarkorja e parë buxhetore për vitin 2024-2026. Në këtë qarkore janë të caktuara limitet dhe tavanet buxhetore për buxhetin e vitin 2024 dhe projeksionet 2025-2026. Buxheti i Komunës së Rahovecit për vitin 2024 në total është 21.340.785€. Nëse bëjmë një krahasim me periudhën e njëjtë të vitit të kaluar ku buxheti ka qenë prej 17.548.000€, atëherë kemi ndryshim pozitiv prej 2.486.000€. Buxheti është i shpërndarë në grante kështu: Në grantin e përgjithshëm kemi 8.486.000€, granti për këshillin e Hoçës së Madhe 29.071€, shërbimi rezidencial është 230.000€ (këto shërbime janë duke u buxhetuar për here të pare), ty hyrat vetanake 1.614.904€, në grantin specifik të arsimit janë 7.138.000€, granti i shëndetësisë është 2.536.000€. Përafërsisht është kështu, e presim edhe qarkoren e dytë buxhetore dhe aty përcaktohen definitivisht limitet apo tavanet. Në pozicion të pagave kemi 10.300.000€, mallra dhe shërbime 2.466.000€, komunal 370.000€, subvencione 890.000€ dhe investime kapitale mbi 6 milion.

Burim Krasniqi – Drejtor, te rritja e buxhetit në bazë të qarkores buxhetore a ka të bëjë kryesisht për shkak të ligjit për paga dhe sa është rritja te investime kapitale?

Afrim Limani – Buxheti në total duhe përfshirë të gjitha kategoritë ekonomike, ka një rritje prej 2.486.000€ dhe rritje është kryesisht është në pozicionin e pagave. Te investime kapitale kemi një diferencë të rritjes prej 356.139€.

4. Shqyrtimi dhe miratimi i propozim-vendimit për dhënien në shfrytëzim afatshkurtër të pronës së paluajtshme të komunës P- 71510069-01910-6, në zonën kadastrale – Retijë;

Afrim Oruqi - Faleminderit kryesues! I nderuar kryetar, nënkryetar, kolegë, të nderuar anëtarë të kuvendit. Para jush keni propozimin e kryetarit të komunës për marrjen e vendimit për dhënien e pronës së paluajtshme të komunës në shfrytëzim afatshkurtër personave fizikë dhe juridikë për 15 vjet. Bëhet fjalë për parcelën me numër 01910-6, në zonën kadastrale – Retijë. Kërkojmë të marrim vendim për 3 ha, me qëllim të destinimit bujqësor.

5. Shqyrtimi dhe miratimi i propozim-vendimit për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës P- 71510069-01910-6, në zonën kadastrale – Retijë;

Në të njëjtën kohë, kërkojmë prej juve formimin e komisionit për zbatimin e procedurave dhe vlerësimin e ofertave për të njëjtën parcelë 01910-6. Komisioni si zakonisht përbëhet prej 5 anëtarëve: Dy prej ekzekutivit, dy prej kuvendit dhe një nga sektori joqeveritar. Ftoj anëtarët e kuvendit që t'i votojnë vendimet veç e veç.

Burim Krasniqi – Drejtor, në propozim thuhet 3000 m², a është gabim teknik, a është 30 ari apo 3 ha?

Afrim Oruqi – Faleminderit kuvendarit Burim Krasniqi, ka qenë një gabim teknik që na ka rrjedhë në numra, e kemi korrigjuar në vendim të ri. Bëhet fjalë për 3 ha ose 30.000m².

Kryesuesi – Atëherë po e vendosim në votim pikën e katërt të rendit të ditës, kush është “për”?... Me shumicë votash miratohet kjo pikë. Vazhdojmë me propozimin e vendimit për formim të komisionit. Dy anëtarë të ekzekutivit janë të emëruar, Besmire Bytyqi dhe Berat Duraku. Neve na mbetet që t'i zgjedhim dy anëtarë tjerë nga kuvendi dhe sa për informim do të formohet edhe një komision tjetër pos këtij, në çoftëse grupet e asambleistave kanë mirëkuptim për vendosjen e anëtarëve, nëse jo, do të zgjedhim me vota.

Hasan Përboqi – Në emër të grupit të AAK-së propozojmë, Shukrije Himaj.

Leonard Morina – Faleminderit kryesues, LVV nuk ka propozim!

Burim Krasniqi – LDK nuk ka propozim!

Bejtullah Deliu – PDK nuk ka propozim!

Kryesuesi – Shumë mirëkuptim i thellë ky! Atëherë i ftojme edhe një herë tre grupet që nuk patën propozime, ta shqyrtojnë mundësinë e një propozimi.

Lirigzon Kastrati – Atëherë ne e propozojmë Eqrem Spahiu-n.

Kryesuesi – Faleminderit Lirigon. Atëherë dy antarët e deleguar nga kuvendi janë: Shukrije Himaj dhe Eqrem Spahiu. Me këtë përbërje po e vendosim në votim pikën e pestë, kush është “për”?... Me shumicë votash aprovohet edhe pika e pestë.

6. Shqyrtimi dhe miratimi i propozim-vendimit për dhënien në shfrytëzim afatshkurtër të pronës së paluajtshme të komunës P- 71510002-01002-0, në zonën kadastrale – Bellacërkë;

Afrim Oruqi - Bëhet fjalë për zonën kadastrale në Ballacërk, për dhënien në shfrytëzim 15 vjet me nr. të parcelës 01002-0 dhe me sipërfaqe të përgjithshme prej 38 ari e 58m². Qëllimi ka të bëjë me rritjen e vlerës dhe kultivimin e bujqësisë dhe blektorisë.

7. Shqyrtimi dhe miratimi i propozim-vendimit për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës P- 71510002-01002-0, në zonën kadastrale – Bellacërkë;

Afrim Oruqi – Kërkohet formimin i komisionit për zbatimin e procedurave dhe vlerësimin e ofertave, bëhet fjalë për parcelë dhe sipërfaqe të njëjtë me komision prej 5 anëtarëve. Ftoj anëtarët e kuvendit që t'i votojnë vendimet veç e veç.

Kryesuesi – Atëherë, a ka dikush diçka për të thënë rreth pikës së gjashtë?... Nëse jo, atëherë po e vendosim në votim. Kush është “për”?... Me shumicë votash, miratohet edhe pika e gjashtë e rendit të ditës. Tani jemi te pika e shtatë, nëse dikush prej anëtarëve të kuvendit ka diçka për të thënë?... Nëse jo, atëherë vazhdojmë me procedurën e njëjtë, i kemi dy anëtarë që duhet t'i delegojmë nga kuvendi, nga ekzekutivi janë të emëruar anëtarë të njëjtë: Besmire Bytyqi dhe Berat Duraku. I ftojme grupet e asambleistëve për propozime.

Hasan Përboqi – AAK, Afrim Berisha.

Merisa Sharku – LVV, nuk ka propozim.

Burim Krasniqi - LDK, nuk ka propozim.

Bejtullah Deliu – PDK, Sejfullah Sejfullahu.

Kryesuesi – Atëherë, dy të deleguarit nga kuvendi janë Afrim Berisha dhe Sejfullah Sejfullahu dhe me këtë përbërje po e vendosim në votim! Kush është “për”?... Me shumicë votash aprovohet edhe pika e shtatë e rendit të ditës.

8. Shqyrtimi dhe miratimi i propozim-vendimit për shpallje me interes të përgjithshëm publik P-7151057-02240-1, në zonën kadastrale – Rahovec;

Afrim Oruqi - Bëhet fjalë për zonën kadastrale në Rahovec në sipërfaqe prej 10.000m², nga sipërfaqja e përgjithshme prej 757 ha 40 ari e 1m². Prej kësaj sipërfaqe, kërkojmë nga ju që të shpallim me interes të përgjithshëm vetëm 1 ha. Bëhet fjalë për parcelën që së fundmi prof.dr. Sabahajdin Cena e ka kaluar kohën e lirë aty. Qëllimi i shpalljes së interesit të përgjithshëm publik është këmbimi i pronës komunale me pronën e institucionit qendror.

Kryesuesi – Faleminderit drejtor. A ka dikush prej anëtarëve të kuvendit ndonjë koment rreth këtij propozimi? Nëse jo, atëherë po e vendosim në votim, kush është “për”?... Me shumicë votash, miratohet edhe pika e tetë.

Para se të vazhdojmë me pikën e 9-të, projekti DEMOS në bashkëpunim me MAPL ka planifikuar që të mbajë një trajnim një ditë (7 qershor, duke filluar nga 09:00) për të gjithë anëtarët e kuvendit komunal të Rahovecit rreth sistemit të menaxhimit të performancës komunale, grantit të performancës dhe platformës elektronike

9. Shqyrtimi dhe miratimi i propozim-vendimit për dhënien e pëlqimit për shpronësimin e pronës së paluajtshme P-71510052-00363-0, zona kadastrale - Mrasor;

Afrim Oruqi - Faleminderit kryesues! Propozohet të jepet pëlqimi për të iniciuar procedurën për shpronësim të pronës së paluajtshme private për interes të përgjithshëm publik për ruajtjen dhe mirëmbajtjen e shtëpisë – shtapit të UÇK-së në zonën e Mrasorit. Çertifikata e pronësisë është në emër të Sokol (Rexhë) Rexhepi me sipërfaqe prej 240m², kjo sipërfaqe në total është 1ha 6 ari e 10m². Kërkojmë prej juve pëlqim për shpronësimin e kësaj sipërfaqe në sipërfaqe prej 2 ari e 40 m² të bashkëngjitur e keni edhe skicën me koordinata të terrenit.

Ilir Pallqa – Faleminderit kryesues! Drejtor, vlera e shpronësimit, caktohet tani apo?...

Afrim Oruqi – Sipas ligjeve, neve na takon vetëm marrja e vendimit. Elaborati dërgohet në ministri të financave në një sektor të veçantë, aty është një departament që merret me vlerësim.

Kryesuesi – Faleminderit! Dikush tjetër?... Nëse jo, atëherë po e vendosim në votim! Kush është “për”?... Me shumicë votash aprovohet edhe pika e 9-të.

10. Shfuqizimi i vendimit Nr.62/2023 për bartjen e mjeteve vetanake të pashpenzuara nga viti 2022 në 2023;

Kryesuesi – Gjatë propozimit për pikë shtesë, e thash arsyeshmërinë e shfuqizimit të këtij vendimi. Ne si kuvend obligohemi ta shfuqizojmë brenda 30 ditëve, meqenëse ministria e Financave e ka marrë një vendim tjetër i cili nuk përputhet me këtë këtu. Nëse dikush prej anëtarëve nuk ka ndonjë gjë për diskutim, po e vendosim në votim! Kush është “për”?... Me shumicë votash shfuqizohet vendimi Nr. 62/23 për bartjen e mjeteve vetanake të pashpenzuara nga viti 2022 në 2023.

Kryetari – Faleminderit kryesues! Do ta vendosim edhe një herë seancën e ardhshme në rend dite, vendimin për bartjen e mjeteve sepse nga kodi 22 na rikthehen mjetet dhe kjo tani është argument që vonesat janë evidente, por pa fajin tonë

Kryesuesi – Faleminderit kryetar! Atëherë, këtu po e përmbyllim seancën e sotme, shihemi në seanca tjera.

Procesmbajtësi:


Albion Krasniqi

